

四庫全書

史部

欽定四庫全書

平定準噶爾方略續編卷十五

乾隆二十六年十二月丙寅

以辦理新疆經費事宜

宣諭中外

軍機大臣奏言臣舒赫德欽奉

諭旨於回京之便將新疆一切經費通盤合計較從前有無節省臣隨將經過城邑臺站需用之項

查明並行文各處駐劄大臣陝甘總督逐一查核列單具奏臣等會同查核現在伊犁回部馬兵三千一百十名步兵一萬一千三百四十七名臺站卡倫兵二千六百二十三名共兵一萬七千餘名所需糧食料豆八萬二千八百餘石俱於屯田支給大臣養廉官兵鹽菜銀歲需三十三萬三千四百餘兩計葉爾羌等城所交騰格作價五萬八千餘兩每年內地添用銀二十

七萬五千餘兩而自大功告成後陝甘額兵減  
十之一所有裁缺馬匹減撤西寧卡倫臺站哈  
密防兵共節省銀六十六萬六千餘兩以補新  
疆之用仍餘三十九萬餘兩奏入

上諭大學士曰前因西陲平定新疆廣闊所有移駐  
大臣官兵歲需養廉經費比前或致增多是以特  
命在外辦事大臣等詳查奏聞頃據舒赫德覆奏  
軍機大臣通行校覈則葉爾羌喀什噶爾等城駐

防應需各項合之陝甘節省諸費視未用兵以前不但絕無所增實可減用三分之二其屯墾自給之糧既可不糜運費且將來耕種日開所入倍當充裕又不在此時約計之內此皆一一指數可按者前用兵之初庸愚無識之徒好生浮議朕固不屑深辨今武功大定或又以長駕遠馭不無多耗內地物力為疑今經查核不但未嘗多費而且有所節省夫天子不言有無國家有當用者雖累巨

萬不可惜也朕非錙銖較量但因西陲用兵始末  
所關不得不詳為剖析以曉庸衆俾知此番籌畫  
非漢唐佳兵勤遠之為朕實用以自信初非欲息  
衆喙而博謏聞也將此通諭中外知之

臣等謹按我

皇上神謨睿算戡定西陲廓二萬里之版圖靖百餘  
年之逋孽

豐庸為亘古所未有而揆諸

淵衷默運惟以寅繼

祖宗欲竟之丕緒為兢兢初非好大喜功之是務況當  
國家全盛之時出帑藏贏餘臻此

成事亦復何所校計乃前此綜核軍儲既已事半而  
功倍今此統衡經費尤不徒酌盈以劑虛始以駐劄  
大臣按款清釐繼以軍機大臣通盤覈實非  
直彙屯賦之正供浮於廩糈裁邊營之舊額  
裕於戍防其明效大驗固章章可考至將來

井牧日開懋遷日衆中外生計更饒即如哈  
薩克等部貿易馬匹一節源源孳息又可以  
次灌輸陝甘腹地督撫提鎮標營之用其為  
資益逾引逾長又豈可以握算計哉伏讀

聖諭以天子不言有無非錙銖較量欲息衆喙而博  
謏聞大哉

皇言雖極天下庸愚無識之徒知無不曠若發矇憬  
然起悟者矣



辛未

命優卹安西提督劉順

上諭大學士曰安西提督劉順前曾隨征金川頗屬奮勉此次平定西陲雖未身列行陣而安西一帶設臺鑿井諸務具見實心經理今聞溘逝深為軫惜著加恩晉贈太子少保再賞銀一千兩所有應得卹典著該部察例具奏

戕害布政使德舒之嗎哈沁塞卜騰等審明正

法

軍機大臣奏言俄羅斯送出之嗎哈沁塞卜騰  
等解京臣等訊係輝特台吉們圖克屬人前年  
八月在阿勒坦和碩遇庫車辦事布政使德舒  
等輒敢肆行戕害又近日護送哈薩克使人之  
喀爾喀兵丁等亦被搶掠應將塞卜騰磔於德  
舒墓前其搶掠賊犯班珠爾等四人俱交刑部  
正法奏入報

欽定四庫全書

平定準噶爾方略續編

卷十五

五

聞

甲戌

命以各城積貯糧石折給臺站回人口糧鹽菜銀兩  
上諭軍機大臣曰海明等奏稱自葉爾羌至闐展共  
計五十餘臺每臺回人十名按月各給鹽菜銀九  
錢今各城餘糧甚多除葉爾羌喀什噶爾各臺俱  
經折給錢文外其阿克蘇所屬各臺回人口糧請  
於來年正月起按照時價動支餘糧折給等語前

因各城糧石不敷暫以銀兩折給今積貯有餘若  
使回人得支本色既於伊等生計有益又可省內  
地運送之繁除阿克蘇各臺照所奏辦理外其葉  
爾羌等處亦應酌看情形一體支給著通諭各城  
駐劄大臣等知之

命調換班索倫兵駐防烏魯木齊

軍機大臣奏言據副都統旌額理奏稱來年派  
出滿洲索倫察哈爾兵四千名前往伊犁烏魯

木齊及回部各城駐防臣等按照情形分別定議外其烏魯木齊應派滿洲兵三百名察哈爾兵二百名換班駐防雖足敷調遣但巡查防守等事仍需派出索倫兵請將派往伊犁索倫兵內調撥一百名駐防烏魯木齊等語查臣等原議派出滿洲兵一千名索倫兵七百名察哈爾兵八百名駐防伊犁滿洲兵七百名索倫兵三百名駐防回部滿洲兵三百名察哈爾兵二百

名駐防烏魯木齊今旌額理等所奏調撥索倫  
兵一百名為瑪納斯等處添設村莊安放卡倫  
起見但烏魯木齊等處較伊犁回部更成內地  
既有滿洲察哈爾兵應毋庸再議更調奏入得  
旨著照旌額理等所請調伊犁索倫兵一百名駐防  
烏魯木齊

丙子

命叙陞辦理伊犁城工官員

上諭軍機大臣曰阿桂等奏稱辦理伊犁城工副將國柱所領綠旗兵一千名內千總羅繼宗高玉均能實心奮勉請委署守備專司版築俟伊等應陞缺出補用再都司哲金泰自烏魯木齊前來管理屯田甚屬奮勉兼理城工亦俱妥協等語哲金泰著賞給遊擊職銜羅繼宗高玉著委署守備俱遇缺即補所遺員缺於額外効力人員內委署命陞賞伊犁屯田官兵回人并定回人交糧額數

上諭軍機大臣曰阿桂等奏稱伊犁屯田八千畝收穫大小麥糜粟青稞等穀共二萬七千一百石有奇約二十分以上等語伊犁屯田豐收皆官兵勤於力作所致自當加恩陞賞所有屯田各官員內除都司哲金泰補授遊擊千總高玉補授守備外餘俱交部議叙兵丁等著阿桂酌量賞給以示鼓勵又

諭曰伊犁屯田回人八百戶收穫大小麥約二十分



以上糜粟青稞約四十分以上合算每人收穀四十石應令其各交米二十石定為成額則回人益知勤動請嗣後人給籽種一石五斗以交糧十六石為率所種四項穀石有豐歉不齊亦可通融抵補等語回人等著與兵丁一體酌量賞給管理屯田回人之前鋒叅領福勒琿遊擊陳聖謨等俱著交部議敘其定額交糧之處俱如阿桂等所請行

丁丑

命授喀爾喀親王策布登扎布為副將軍郡王車木楚克扎布為副盟長

上諭軍機大臣曰喀爾喀親王得親扎卜病故其副將軍副盟長員缺應行補授策布登扎布車木楚克扎布俱在軍前歷練奮勉副將軍員缺著策布登扎布補授副盟長員缺著車木楚克扎布補授

壬午

命酌敘新疆辦事年滿官員

上諭軍機大臣曰淑寶等奏哈密辦事之寧夏防禦  
雙明等年滿請再留一年以應陞之缺即用等語  
昨據永慶奏請將隨伊行走之前鋒廣保等即用  
一摺朕曾諭以大功告成伊等所辦事務非軍前  
効力可比且三年更換與內地各員勞逸適均不  
必過於優敘著酌量給予陞轉之途以示鼓勵今  
淑寶所奏與前事一體雙明等著再留一年酌示  
鼓勵不必以陞銜即用

癸未

命陞賞入

覲之回部伯克等

上諭軍機大臣曰此次入覲之伯克阿里瑪和卓等甚屬奮勉阿里瑪和卓特穆爾遜都拉和卓素勒坦和卓著賞戴孔雀翎阿卜都賚賞戴藍翎古爾班和卓阿卜都拉墨墨氏敏伊斯邁勒等著交與永貴等以應陞之缺即用

丙戌

諭叅贊大臣阿桂等辦理孳生牛羊事宜

上諭軍機大臣曰阿桂等奏稱烏里雅蘇台送到孳生羊二萬隻若令兵丁等牧養或因更換有期不甚愛惜請分給居住伊犁之厄魯特回人等令其加意照管計羊十隻每年取孳生三隻有餘者量加賞賜不足則令其賠補其續送牛羊俱一體派撥等語辦理甚屬妥協著照所請行

壬辰

命察哈爾總管色楞等赴新疆効力

上諭軍機大臣曰兵部奏稱來京候旨之察哈爾總管色楞係騎都尉職銜衮布策凌係世管佐領高亮係騎都尉職銜蕪世管佐領請以本身職銜在該旗効力等語色楞等係加恩補授察哈爾總管之員自應實心供職訓練所部乃嗜飲偷安若所屬羣相效尤有闕該旗風俗因諭令來京其員缺

已另行揀選補授矣伊等既不勝總管之任若令其仍在該旗行走則適如所願轉得家居安樂非所以示懲創但其罪尚不至革職色楞衮布策凌高亮著分發伊犁阿克蘇喀什噶爾三處効力行走以贖前愆

甲午

命議卹齋送

勅書之把總秦子雲等

上諭軍機大臣曰據旌額理奏稱上年派遣把總秦子雲等十人齎捧勅書至哈薩克已交與侍衛納旺而伊等未回烏魯木齊咨查各處俱無形跡必因迷途被害等語秦子雲等雖非陣亡可比究因公事捐軀殊為軫惻著加恩照陣亡例減半議卹

乾隆二十七年春正月辛丑

命哈薩克使人入覲

行在



上諭軍機大臣曰成衮扎布等奏哈薩克阿布勒瑪  
木比特等遣使入覲正月初可至軍營等語著派  
乾清門侍衛等馳驛前往遇見使人時即帶赴南  
巡行在仍先期奏聞

乙巳

議酌留聞展等處駐劄兵丁及減收糧石事宜  
軍機大臣奏言永貴等奏烏魯木齊一路及回  
部各城共有屯田兵萬餘名除烏魯木齊五千

名哈喇沙爾兵七百餘名毋庸議裁外其庫車  
阿克蘇葉爾羌喀什噶爾英噶薩爾和闐烏什  
等處或當要路或近外藩所駐兵丁俱仍其舊  
惟闡展兵五百四十名酌留三百名賽里木拜  
兵一百五十名酌留五十名等語應如所奏將  
所減兵數汰其老弱廢疾撥回原營其空出地  
畝令回人承佃又德爾格奏吐魯番應交官糧  
四千石俱已全完應照原議每百石賞布五疋

茶五包等語查現在葉爾羌等處回人交納官糧並無賞賚事非畫一若竟行裁減或無知回人妄生他議今闡展餘糧甚裕兵丁又已議裁與其解送布疋茶葉備賞不若稍減糧額臣等酌照賞給價值減糧五百石仍傳諭回人毋得虧缺正額奏入得

旨吐魯番應交官糧著加恩減免一千石餘依議

庚戌

恩免采銅回人應交官糧

上諭軍機大臣曰海明等據阿克蘇阿奇木色梯巴  
勒氏等呈現在採銅回人一百戶伯克二員不敷  
差遣請添設伯克一員回人二百戶每年交銅二  
千八百三十餘觔等語著照所奏辦理至採銅回  
人所有應交官糧准其豁免俟鼓鑄既足停其採  
銅時再行按戶徵收不必分派回人等代為完納

辛亥

議伊犁伯克品級印照各事宜

軍機大臣奏言據阿桂奏前定回部伯克品級  
時曾將都管等六伯克俱定為七品續經伊犁  
初駐回人准戴六品頂藍翎以示獎勸但六品  
哈子密喇卜伯克缺俱由七品都管伯克等揀  
選未免等威無別請將此次七品伯克等暫行  
准用六品頂帶缺出另補則仍用本身品級頂  
帶又舒赫德奏各城阿奇木伯克給與圖記印

照今伊犁阿奇木伯克木薩亦請一體賞給等語查都官伯克等既定為七品其頂帶自應照本身品級至葉爾羌等城阿奇木伯克業經給與圖記印照伊犁之阿奇木事同一體俱應如所奏辦理奏入

上從之

議官買回人所役厄魯特人口事宜

軍機大臣奏言德爾格奏吐魯番公素賚瑞屬

下回人所役厄魯特男子二名攜帶鳥鎗逃走  
臣即行文各處查拏並聞回人等役使厄魯特  
男婦頗多時有逃者恐流為瑪哈沁前次將肅  
州厄魯特發往伊犁曾因伊等告有眷屬在回  
人處即給與官銀取回完聚請照此例交與各  
回城駐劄大臣傳諭回人家有厄魯特願行交  
官者即給價取回等語臣等酌議德爾格因厄  
魯特不堪回人苦役以致逃出為匪議照肅州

派出厄魯特之例給價贖取亦寧謐地方之意  
應如所奏仍酌定大口給價七兩小口給價三  
兩其價即於該回人應納賦稅內扣抵若無交  
官之項即給與現銀贖取發往伊犁安插奏入  
上從之

丙辰

諭烏魯木齊辦事副都統旌額理等辦理遣犯事宜  
上諭軍機大臣曰旌額理等奏稱發往烏魯木齊屯



田遣犯等請先給屯地十二畝與兵丁一體計畝  
納糧伊等亦有携眷者酌給地五畝自行開墾其  
未收穫以前官為養贍家口等語著照所請行伊  
等俱係免死減等之犯理宜嚴加管束果能知罪  
守分盡力耕作尚可姑容若生事脫逃自當於本  
處正法即尋常鬪毆等事亦不可照內地之例辦  
理著即傳諭知之

丁巳

命更換駐防黑龍江官兵即以本管官員帶領

上諭軍機大臣曰傅玉奏派往伊犁等處更換之黑龍江等城官兵一千名或候欽派大臣帶領或即令本處協領委營總等送至烏里雅蘇台再於該大臣等內出派帶領等語此次官兵係派出駐防非征戰可比毋庸派出內地及軍營大臣著即用該協領營總等送至烏里雅蘇台成袞扎布等再派嚮導一員帶領前往伊犁

己未

命優卹三等侍衛蘇魯克沁并酌派侍衛補缺

上諭軍機大臣曰新柱等奏三等侍衛蘇魯克沁在  
葉爾羌病故等語蘇魯克沁病故雖非陣亡可比  
但伊前在軍營甚屬効力著加恩賞給恩騎尉准  
伊子承襲一次仍賞銀五十兩所遺員缺即交領  
侍衛內大臣將曾經揀選侍衛內酌派一員前往  
不必再行引見

辛酉

命優卹甘肅提督閔相師

上諭大學士曰甘肅提督閔相師久歷戎行克嫻武略隨征西路奮勇策勲前因患病准令暫行解任并賞給全俸俾得盡心調攝以冀速愈遽聞溘逝深為軫惜著加贈太子太保賞銀一千兩治辦喪事所有應得卹典仍著該部察例具奏

二月己巳

命乾清門侍衛薩穆坦來京

上諭軍機大臣曰旌額理等奏阿思哈於前往查勘瑪納斯等處屯田之便酌帶兵丁往額林哈畢爾噶搜捕嗎哈沁領隊侍衛薩穆坦告請効力已一同起程等語薩穆坦在烏魯木齊已逾三載自應令其回京現在軍營侍衛足敷差遣亦無需用乾清門侍衛之處薩穆坦回營時即著來京

命賞解送牲隻之都爾伯特兵丁等一年錢糧

上諭軍機大臣曰成袞扎布奏喀爾喀達什彭楚克等官兵同都爾伯特扎哈沁兵丁五十名護送伊犁牛羊駝隻於二月起程本年即可轉回似不必給與一年錢糧等語喀爾喀係舊臣僕著照所請行都爾伯特新附且人亦不多從前既有預支錢糧之例此次著仍行賞給

庚午

葉爾羌阿奇木伯克等辦送回人一百三十戶

和闐伯克等辦送回人二十四戶前往伊犁屯  
田

命加恩獎賞如例

癸酉

諭哈喇沙爾辦事散秩大臣達桑阿更換試用効力  
官員事宜

上諭軍機大臣曰據達桑阿奏沙喇沙爾現有試用  
官四員効力官一員請照現任官員例以三年為

限視其行走何如再准更換其現任道員蘇凌阿  
請旨定限等語前經舒赫德等定議三年更換之  
例今達桑阿所奏自屬循照辦理但伊等究係試  
用及効力人員與現任官員有間若行走平常理  
應仍留二三年再行請旨其蘇凌阿係命往辦事  
之員著候三年限滿奏請派員更換

命哈喇沙爾玉古爾等處不必增派採銅回人

上諭軍機大臣曰達桑阿奏玉古爾庫爾勒之伯克



等因阿克蘇採銅伯克等加倍交納銅觔情願增  
派採銅回人四十名等語阿克蘇地廣需用錢丈  
處多因允該伯克等所請添派採銅人戶玉古爾  
較阿克蘇甚小若多採銅觔恐滋紛擾可不必添  
派

甲戌

命回人交納糧石據收成實數增減

上諭軍機大臣曰永貴等奏英噶薩爾阿奇木伯克

素勒坦和卓呈稱本年秋收頗裕與衆伯克等議  
除原定糧石五百四十帕特瑪外多收五十一帕  
特瑪仍係十分取一嗣後查核多出之數即行呈  
報等語素勒坦和卓勤於勸課既足糧額復有盈  
餘甚屬可嘉永貴等已給與蟒緞一端著再加恩  
賞緞二端但豐年既多收糧石若遇歉收之年亦  
應酌減方為平允嗣後著據實呈報因時增減副  
朕體恤回人之意

乙亥

命以官錢收換回人普爾如數給發

上諭軍機大臣曰新柱等奏稱葉爾羌喀什噶爾和  
闐三城回人等每月以普爾換易新錢已令減半  
交納請俟新錢流通時再為酌減等語換易普爾  
不過使回人通用新錢自應酌量情形何必限以  
成數況以兩普爾易一新錢行之已二三年諒所  
收普爾亦足供鼓鑄若仍照前例恐有妨回人生

計著加恩以一普爾易一新錢則回人無所虧損而舊普爾亦必盡收著傳諭新柱等嗣後遵照辦理

丙子

命丁憂總兵官金梁留辦伊犁屯田事務

上諭大學士曰楊應琚奏興漢總兵官金梁現丁父憂該員駐劄伊犁有承辦屯田事務請暫停開缺等語金梁在伊犁實為出力得用之人著賞給伊

家銀五百兩交伊弟料理喪事令其在任守制仍  
留伊犁不必開缺

丁丑

哈薩克阿布勒瑪木比特等遣使策伯克等入

覲恭遇

聖駕南巡

上召見於揚州

行在賜冠服有差

壬午

諭叅贊大臣阿桂等辦理哈薩克事宜

上諭軍機大臣曰阿桂奏哈薩克阿卜丹素旺鄂拓克之哈喇圖魯什遣伊子弟前來貿易送出厄魯特男婦大小四十四名口已酌量獎賞布帛等語哈喇圖魯什聞伊犁安插厄魯特即將所收男婦送出固見誠悃亦不無希冀賞賚著加恩照前賞之數各增一分遇便頒給仍以朕旨宣示又

諭曰阿桂奏上年越界游牧之哈薩克等驅逐之後  
仍有潛來過冬者似宜微示懲創因派伊勒圖豐  
納亨領兵三百餘名踰庫克托木嶺將潛來巴柴  
勒卜什之哈薩克等拏獲三四人收其馬羣解送  
伊犁查訊擇人尚明白者釋放令其傳諭等語所  
辦甚是哈薩克等性喜徼倖伺我兵撤回乘間駐  
牧亦事之所有念伊等已經歸附此次姑從寬免  
著傳諭阿桂等若拏獲哈薩克人等至伊犁即諭

云大皇帝屢降諭旨謂哈薩克不當越境游牧我等又驅逐三次仍不悛改因拏獲數人請旨解京治罪奉大皇帝旨謂我等辦理甚是但念哈薩克等歸附未久性復愚蠢仍加恩姑從寬免嗣後若不知警畏即照爾等所奏辦理此乃格外施恩不可再得傳諭後酌量稍給口糧遣回仍將續辦情形即行具奏

議酌給青海扎薩克等游牧事宜



陝甘總督楊應琚奏言理藩院議駁多爾濟請將青海入官曠地酌給該扎薩克游牧欽奉

諭旨以此時新疆展拓不應目為邊境即酌給伊等游牧亦無不可交臣查辦臣查得從前羅卜藏丹津入官之地其係西寧肅州鎮標馬廠及番族駐牧者未便撥給惟素拉郭勒至西爾噶勒金二處東西五百餘里南北三十餘里現在閒曠且與該扎薩克等游牧相近請以賞給駐牧

其西爾噶勒金過河即係產礪山場曾經開採  
封禁應指明定界飭交該扎薩克等就近看守  
奏入得

旨軍機大臣議奏尋議多爾濟等據該扎薩克所指  
洮賚郭勒等處今該督查勘現係官馬廠地及  
各番族駐牧處所自不便賞給惟素拉郭勒至  
西爾噶勒金既屬閒曠與該扎薩克游牧相近  
應如所請酌量賞給其西爾噶勒金過河係產

礦山場久經封禁應請北以山梁為界西以河  
為界河東聽其駐牧河西即照青海察察寧楚  
爾鉛礦之例該扎薩克等看守毋許越界盜採  
奏入

上從之

甲申

賜哈薩克阿布勒瑪木比特

勅書

皇帝勅諭哈薩克阿布勒瑪木比特阿布勒比斯沙  
呢雅斯蘇爾統罕和卓博羅特蘇爾統爾等遣策  
伯克等入覲朕適巡幸南服特遣侍衛護送爾使  
人等至行在加恩宴賚今遣令起程所賜爾阿布  
勒瑪木比特等緞疋紬綾器什及使人冠服器什  
銀兩各有差從前爾等所告搶掠哈薩克之瑪哈  
沁查明首惡係塞卜騰等我兵追入俄羅斯該部  
落盡行縛獻訊出傷我官兵情事俱已正法至伊

犁駐兵凡塔爾巴噶台巴爾楚克等處與爾等游牧相近既為朕臣僕當聽將軍大臣等約束不可越境游牧致遭驅逐又去年送爾等使人之喀爾喀梅楞達什敦多卜遇嗎哈沁被掠至爾沙呢雅斯蘇爾統所屬章呼斯巴圖爾巴雅木拜之地即派沙爾噶勒岱等護送轉回具見爾沙呢雅斯蘇爾統恭順之忱朕甚嘉悅故於常賜外賞賚有加章呼斯巴圖爾等亦俱賞賜沙爾噶勒岱此次親

來又加賞銀兩其各祇受爾等惟約束所部永矢  
惓忱以受無窮之澤特諭

庚寅

烏魯木齊辦事副都統旌額理等疏奏安插屯  
田民人事宜

旌額理等奏言臣等前議內地貧民安插烏魯  
木齊賞借籽種農具蓋造房屋銀兩等事荷蒙  
俞允查楊應琚送到人戶臣等派員指給地畝督令

開墾必需馬力現在市易哈薩克馬匹約有三  
等請將骨格小者戶給一匹折銀八兩同前奏  
蓋房銀兩折交米麵一石分年完納其兵丁五  
百名原議照巴里坤蓋造房屋例每名日給米  
八合麵四兩外加鹽菜銀三分但所給米麵尚  
覺不敷請將鹽菜銀兩之半照定價折給米麵  
既有益兵丁口食亦可稍節帑項奏入得

旨如所請行





平定準噶爾方略續編卷十五

欽定四庫全書

平定準噶爾方略續編卷十六

乾隆二十七年三月甲午朔

諭陝甘總督楊應琚酌通新疆商販

上諭軍機大臣曰永貴等奏稱自回部蕩平內地商民經由驛路及回人村落彼此相安臺站回人又疏引河渠開墾田地沿途水草豐饒行旅並無阻滯若曉示商民不時前來貿易即可與哈密吐魯

番一體於官兵亦有裨益等語新疆貿易自應流通但須聽商人自便不可官為勒派著傳諭楊應琚將此曉示商民有願往者即給以印照毋使胥吏需索人自樂於趨赴矣并傳諭永貴知之

闡展辦事郎中德爾格疏奏安插屯田回人事  
宜

德爾格奏言臣承准軍機處議覆將闡展屯田兵五百名裁汰二百四十名遣回本營所遺地

畝原派吐魯番額敏和卓所屬六十戶住闡展  
九十三戶住連木齊木威魯堡珈如拉所屬六  
十戶住連木齊木二十七戶住洋赫每戶給田  
五十畝今酌將額敏和卓人戶全歸闡展珈如  
拉人戶全歸連木齊木以便約束仍有餘田三  
千畝今素賚瑞派給莽噶里克沙呼里回人墾  
種至裁汰兵丁所餘牲畜未免閒曠現在威魯  
堡回人尚乏屯田牲畜請量估價值給與使用

其各項農具亦俱作價分給回人於二年內交納糧石抵銷奏入報

聞

喀什噶爾辦事尚書永貴等疏奏辦理回地水利情形

永貴等奏言查回人地畝俱藉山水灌溉凡溝渠深淺圩堤厚薄俱須相地勢之高下測水流之緩急舊時俱有定式因伊等不知守護修葺

以至淤阻塌陷夏凜冬冰行旅亦滯臣等派喀  
什噶爾伯克率所屬密喇卜伯克等遍歷村莊  
詳加察勘或應浚渠以通其源或應築堤以蓄  
其勢至若開通路徑架疊橋梁務期堅固以利  
行人仍行文各駐劄大臣一體酌量辦理奏入

報

聞

壬寅

命詳定發遣新疆人犯之例

上諭大學士曰發遣伊犁及烏魯木齊等處人犯定例祇有給發屯田兵丁為奴之語至給與何項官兵及作何辦理之處從前未經議及伊犁等處官兵非若黑龍江之土著設換班回將攜其人歸來乎著軍機大臣會同該部詳悉另行定議具奏尋議查定例發往各省駐防為奴人犯俱不准典賣他所現在發遣人犯係隨屯田兵丁耕作俱

照前例辦理但未經分析何項兵丁臣等公議  
察哈爾及綠旗屯田兵丁俱應給與為奴人犯  
察哈爾兵係永遠屯駐毋庸置議其綠旗兵有  
更換者即將所得人犯交與接班兵丁為奴或  
係撤回及調往他所並無接替之人亦即另行  
撥給屯田兵丁隨同力作奏入

上從之

丁未



諭喀什噶爾辦事尚書永貴等查奏預備官兵馬匹  
牲隻款項

上諭軍機大臣曰永貴等奏本年換班官兵前來所  
有馬匹牲隻未免損傷應行補給其一切差遣及  
臺站卡倫舊兵遣回時亦應預備等語似不僅為  
換班官兵起見官差行走及坐臺守卡人等原有  
額設之項且倒斃自有准銷成例不過酌量添補  
奏內約計喀什噶爾葉爾羌阿克蘇三城需馬一

千三四百匹并採買牛隻未經分晰款項殊屬含混著傳諭伊等查明詳悉具奏

諭烏魯木齊辦事副都統旌額理酌派侍衛事宜

上諭軍機大臣曰昨旌額理奏乾清門侍衛薩穆坦告請前往額林哈畢爾噶搜捕嗎哈沁曾諭以薩穆坦在軍營年久回烏魯木齊之後即著來京俟昇額係與薩穆坦一同派往者亦著回京伊等係以領隊大臣派往烏魯木齊辦事之員今該處大

員足敷辦理不須再為補缺或有需用侍衛之處  
旌額理再行請旨

戊申

命傳諭哈薩克阿布勒瑪木比特約束所部毋越境  
游牧

上諭軍機大臣曰旌額理等將哈薩克貿易人等所  
賚阿布勒瑪木比特奏章進呈大意謂我兵收伊  
屬人性隻之時有懇求給還者復被毆擊等語近

據阿桂奏遣伊勒圖驅逐越境游牧之哈薩克此時未必即回想仍係去年所辦事屬既往伊等尚以為言此次復行驅逐必更生疑懼昨即諭阿桂等以此次姑從寬免著仍將前旨明白宣示若仍不悛改即重治其罪將收所屬人牲隻派豐安同侍衛二員照舊管押送交阿布勒瑪木比特諭以定制不可妄干特恩不可屢得至貿易人等所稱收取游牧一事亦告以大皇帝業經洞鑒加恩免

卷十六  
罪爾等當感激聖恩安居本界勿得踰越滋事

陝甘總督楊應琚等疏奏移駐巴里坤官兵起程

楊應琚等奏言安西提標五營前經酌議以中左右三營兵丁一千五百名移駐巴里坤於本年二月分起前往其前後二營兵丁一千四百九十二名移駐烏魯木齊於秋初料理起程至安西各協營現在巴里坤聽差兵丁約八九百

名若皆撤回另補未免煩費請按數截留即以  
應行移駐兵丁扣抵俱經臣等會奏茲臣楊應  
琚同提督臣五福會商將三營官兵酌分十起  
於二月二十八九等日陸續起程奏入報

聞

辛亥

訓諭失叅疎防伯克之阿克蘇辦事都統海明等  
上諭軍機大臣曰新柱等奏稱額里齊城回人尼雅

索丕盜馬逃來阿克蘇被伯克額肯阿克薩哈拉盤獲送交伯克帕察沙卜看守又復脫逃今為和闐巡街回人拿獲請照回例治罪等語尼雅索丕既經拿獲交伯克帕察沙卜看守復行疎脫海明自應一面拿緝一面將疎防之伯克叅奏若謂該伯克諱匿不報現在新柱奏內又有疎防伯克經阿克蘇大臣斥革之語則伯克等之去留尤伊所當奏聞者著傳諭海明等將從前辦理此案不行

具奏緣由明白回奏額肯阿克薩哈拉盤獲賊犯  
審出情節殊屬可嘉著加恩賞緞二端以示鼓勵

丙辰

諭副都統額爾登額辦理解送逃人事宜

上諭軍機大臣曰前經成衮扎布奏稱俄羅斯比爾  
噶底爾將逃入伊地之烏梁海敦多克等二百八  
十餘名口送回俄羅斯此次甚屬遵守定約著額  
爾登額將從前留養熱河之俄羅斯逃人等送交



該處其送來逃人中起意為首之敦多克等著派員即行解京其餘人等若盡行解京不但行走煩費且審明治罪之處烏梁海等亦不得而知著於為首各犯外再查其次情罪難逭者押送軍營正法仍傳諭烏梁海等俾知所警畏不敢恣意脫逃其罪不至死者仍陸續看守交部審明定擬發遣已未

命獎賞叅贊大臣阿桂等

上諭軍機大臣曰阿桂等奏稱伊勒圖豐訥亨驅逐越界游牧之哈薩克拿獲和莽伯凱等五人收其馬二千餘匹前來伊犁將為首二人暫留候旨其三人釋回令齎書曉示阿布賚等語阿桂辦理甚屬妥協著賞給荷包二對伊勒圖豐訥亨著各賞荷包一對拏獲之和莽伯凱等理應治罪示警但伊等性本愚蒙歸附日淺不深知內地法度昨已降旨不必解京即釋回部落其馬匹亦著給回豐

訥亨此次驅逐哈薩克熟悉伊等情形即著傳旨  
曉諭其原派之豐安不必前往

命獎賞瑪納斯等處屯田官兵以原任巡撫阿思哈  
駐劄辦事

上諭軍機大臣曰旌額理等奏稱從烏魯木齊辦給  
瑪納斯庫爾喀喇烏蘇晶河屯田兵丁馬匹糧餉  
俱全抵各該處現在水土滋潤三月前後可盡行  
播種等語此次派往屯田兵丁衝寒行走照管車

輛馱載奮勉可嘉著旌額理等酌量獎賞以示鼓勵瑪納斯等處既編設村莊應駐大員總辦烏魯木齊已有旌額理永德著阿思哈即駐劄庫爾喀喇烏蘇辦理三屯事務俱著傳諭知之

癸亥

命定奏請黜陟回部伯克之例

上諭軍機大臣曰昨新柱等審訊盜馬回人脫逃一案有疎防伯克帕察沙卜業經阿克蘇大臣斥革

朕以伯克等之黜陟理宜具奏降旨詢問但回部伯克甚多大小不等若一概具奏亦覺繁瑣嗣後伯克等有陞選降革等事五品以上著各該大臣專摺具奏六品以下著年終彙奏

夏四月乙丑

諭開展辦事郎中德爾格等酌辦種植事宜

上諭軍機大臣曰楊應琚奏請將開展屯兵收穫之芝麻菜子分借回人種植俟收穫後扣還籽種其

餘量為交官以抵應輸額賦等語闡展所種芝麻  
菜子上年已試有成效自應借給回人種植以省  
運油之費但回地向未有此若令其分種恐非所  
素習著傳諭德爾格酌量辦理或伊等不願承種  
即毋庸拘泥該督來咨勉強從事再烏魯木齊地  
畝廣遠現在開墾三屯或即於該處播種以濟日  
用亦無不可并傳諭楊應琚知之

己巳

諭喀什噶爾辦事尚書永貴等酌辦官買厄魯特事

宜

上諭軍機大臣曰永貴等奏稱准軍機大臣議覆德爾格奏將回人收養之厄魯特官為買出送伊犁安插因詳加察訪有實受回人苦役者即給價贖取有為家主信用妻孥牽累不願贖身者各隨其便等語從前辦理此事原因厄魯特等受回人折挫與其畏懼脫逃流為嗎哈沁不如贖出與現在

伊犁之厄魯特等一同安插以靖地方此亦視伊等情願與否耳若伊等果能相安無事不致逋竄為匪又何必勉強贖出著傳諭永貴即如所奏辦理并傳諭各駐劄回部大臣等知之

以辦理外藩事宜

訓諭尚書永貴等

上諭軍機大臣曰永貴等奏稱霍罕額爾德尼伯克因從前冲噶巴什布魯特搶掠貨物未經全還懇



求補給所開銀數與邁瑪喇伊木原報不符將前  
後情節復書曉示等語覽永貴等復書詞氣太弱  
霍罕人等來喀什噶爾貿易所攜不過土產豈有  
齋銀四萬餘兩之理此特該部落人等見給還貨  
物轉生僥倖事理易明永貴等應即向來使斥責  
云爾等貿易往來人數及所攜貨物誰不知之安  
得有齋銀數萬之事況搶掠爾等之烏默爾比業  
已解京治罪前次查給貨物爾等屬人俱感激領

回不便復據一面之詞再行辦理似爾貪得無厭  
將欲誰欺如此明白宣諭方為妥協乃區區致書  
分析殊為失體著傳諭永貴等嗣後遇此等事須  
加意果斷毋得稍露怯弱之意

庚午

諭葉爾羌辦事都統新柱等訓戒伯克等毋巧取所  
屬

上諭軍機大臣曰新柱額敏和卓奏稱葉爾羌和闐

所積穀石甚多如酌量有餘之數以二折交錢  
文採買牲隻八折交納布運至伊犁換易哈薩  
克馬匹既於公事有益而該城伯克等亦俱樂從  
等語折交穀石既屬公私兩便自應如此辦理但  
回城伯克每多巧取若指稱公事科斂其下尚屬  
有限此等折交錢布所及者廣最宜留心查辦即  
如鄂對阿什默特二人鄂對尚可信無巧取之事  
然此特因額敏和卓在彼有所顧畏耳今以玉素

富往代雖同屬舊時臣僕而資望少減恐鄂對不  
無玩忽額敏和卓於鄂對宜從容開導云爾當勿  
改初心我暫歸一二年再來駐劄仍可相見如故  
庶伊知所謹凜將來與玉素富交代時亦宜告知  
俾得留心辦理凡遇回部伯克等俱當詳悉訓戒  
務期正己率屬以挽頽風

葉爾羌辦事都統新柱等疏奏籌辦新錢易布  
事宜

新柱等奏言葉爾羌所鑄新錢共十萬三千騰格有奇除易換普爾錢文外尚存四萬餘騰格普爾漸次短少雖新錢與舊普爾如數相易亦未即流通適值阿桂咨商以布准糧解送伊犁與哈薩克貿易一事因思葉爾羌布價甚賤每疋只需普爾四五十文計四萬餘騰格即可買布四五萬疋與哈薩克交易每疋折銀一兩利已加倍不獨省內地運解之繁而錢文流通回

人生計亦可充足臣等詢之衆伯克無不欣感  
謂回部舊例以二舊錢易一新錢今如數兌換  
已屬有益無損又以收買布疋其益更不能盡  
言惟多植棉花勤於紡織數年之間元氣可復  
臣等定議後即曉諭該伯克等現屬三月種棉  
之時務宜勸課屬人各勤各業奏入報

聞

辛未

諭喀什噶爾辦事尚書永貴等暫緩採辦銅觔

上諭軍機大臣曰永貴等奏稱回部鼓鑄錢文仍須採礦方足應用現派員役率領回人三十名在碩爾布拉克等處試採得銅頗旺復添派回人裹帶口糧前往採辦等語昨據達桑阿請多採銅觔曾諭以恐累回人不必添派今永貴之意與達桑阿相同回部新鑄錢文尚多採銅原非急需著暫緩辦理

諭喀什噶爾辦事尚書永貴等酌辦內附布魯特等

游牧事宜

上諭軍機大臣曰伊勒圖奏稱阿克賽游牧布魯特之伊穆喇特比及阿哈拉克齊三人率所屬二百戶移於雅賽游牧與指給之地不合因行文曉示俟秋收後仍令移回等語布魯特等離指給之地任意遷移固屬不合但伊等性本愚蒙惟知水草之利今諭以內地定制未必通曉轉生疑懼且雅



賽距阿克賽僅隔一站現屬閑曠亦於事體無礙  
著傳諭永貴伊勒圖嗣後辦理布魯特等祇宜加  
意約束俾安靜無事雖不可縱令伊等任意游牧  
至於逐水草遷移相去不遠者不必過於拘泥

葉爾羌辦事都統新柱等疏奏愛烏罕等處情  
形

新柱等奏言由土默特前來貿易人等呈送拉  
達克喇嘛書譯稱聞得愛烏罕頭目愛哈默特

沙統衆將痕都斯坦汗阿里雅木吉爾殺害其  
子阿里雅科瓦爾逃竄愛哈默特沙立阿里雅  
木吉爾之孫遂回游牧又統衆至固珠喇特脅  
降克什米爾部落不服現在相攻等語臣等酌  
量復書辦令起程奏入報

聞

喀什噶爾副都統伊勒圖疏奏霍罕塔什干等  
處情形

伊勒圖奏言霍罕貿易回人告稱霍罕迤北四  
站有塔什干原係舍氏和卓摩羅沙木什二人  
分管舍氏和卓漸強莫羅沙木什被其侵奪訴  
於霍罕額爾德尼伯克乞師復還侵地舍氏和  
卓會合西哈薩克及霍濟雅特之丕色勒伯克  
攻殺摩羅沙木什二子額爾德尼遂往攻塔什  
干丕色勒伯克亦來赴援等語臣密委阿奇木  
伯克噶岱默特確訪情形酌量辦理奏入報

聞

壬申

諭陝甘總督楊應琚詳查各營馬匹額數價值

上諭軍機大臣曰楊應琚奏請將烏魯木齊貿易馬匹撥補移駐新疆各營倒斃缺額一摺業經軍機大臣覆准并議將肅州各營每年額缺一體通融酌撥等語著傳諭楊應琚將肅州各營每年額缺若干向例領銀採買價值若干如此辦理較之常

年節省若干一併查明具奏

甲戌

叅贊大臣阿桂等疏奏添駐伊犁屯田回人事  
宜

阿桂等奏言葉爾羌等城回人續請移居伊犁  
者二百十四戶五百七十名口臣等交阿奇木  
伯克木薩等安插量其年力精壯者與從前移  
駐之一百十戶共為二百五十戶給與籽種口

糧牲隻農具合經制屯田之回人一千戶定為  
一千二百五十戶其老弱有疾之七十四戶暫  
交該伯克養贍年幼者俟其長成仍可充補屯  
田之缺再此項回人若俱令在河北固勒扎等  
處屯田亦尚可容但不如河南居住百餘戶則  
兩岸俱有莊屯於觀瞻既協而接濟穆素爾嶺  
臺站更為順便因於霍濟格爾巴克編設一屯  
安插八十戶海努克編設一屯安插七十戶奏

入報

聞

戊寅

申諭喀什噶爾辦事尚書永貴等採辦銅觔不必添  
派勒限

上諭軍機大臣曰永貴海明和其衆等奏稱阿克蘇  
所添採銅回人因豁免伊等應交糧石呈乞代奏  
謝恩又稱各城回人等添採銅觔以四年為限等

語採辦銅觔原以裕官兵回人之用自當從容辦理惟就現在所得之銅源源鼓鑄即稍有遲滯亦無甚闕係何必添派回人勒定年限昨諭達桑阿等不必添採銅觔永貴似尚未奉到故如此陳奏至永貴等所奏回衆僉稱情願連年添採銅觔之處大臣等面詢回人伊等焉敢以不願為詞即謂回人愛重新錢亦事之所有但既非鑄錢賞給伊等且仍收其普爾又令其採銅為鼓鑄之資謂皆



出於本願恐未必盡然凡事當權其輕重緩急不可張皇欲速著傳諭永貴等知之

辛巳

命副都統舒泰往葉爾羌代護軍統領德爾素

上諭軍機大臣曰新柱等奏稱護軍統領德爾素忽患氣弱之症不時舉發等語德爾素看來未能即痊著派舒泰前往更換回京

壬午

巴里坤辦事都統永寧等疏奏酌留各營官員事宜

永寧等奏言自安西挈眷赴巴里坤駐防官兵一千五百名分為十隊已陸續到齊臣等照料安插訖查巴里坤各項差務需官二十餘員現在所到三營大小官共二十員此內除撥往屯田及本營差委外所餘十餘員實不敷用臣等公議酌留舊駐都司一員守備一員千把總共

十員仍令聽候差遣外其餘官員兵丁皆面為  
交代令回原營所留官員照各城例三年一換  
此後或有自營撥回或裁減差務之處再行酌  
量辦理奏入報

聞

癸未

命酌賞新到伊犁之厄魯特等

上諭軍機大臣曰阿桂等奏稱由哈薩克布魯特來

投之布魯特等安插伊犁此內攜有牲隻可以自給者居其大半其餘多屬貧乏等語來投之厄魯特等求安生業居住伊犁於耕牧之事頗知奮勉但甫經安插一切俱須料理應酌量稍為資給俟地畝成熟牲隻孳息始可接濟著加恩將生計稍可者各賞銀一兩貧乏者大口賞布二疋小口布一疋仍賞銀一兩其各處收集之厄魯特等亦著一體給賞各頭目等酌賞緞疋此次係朕特恩著

阿桂等明白曉示令嗣後益加鼓勵以裕生計

議酌籌駐防官兵回程事宜

陝甘總督楊應琚奏言南北兩路換班撤回之  
滿洲索倫察哈爾官兵共三千二百餘員名又  
加以跟役人衆若俱於哈密雇車送至肅州所  
費不貲且恐難於雇覓若仍由肅州備用愈覺  
繁瑣請將換回之索倫察哈爾兵照前赴新疆  
換防官兵之例皆令行走邊外較為省便其應

由內地入京之滿洲官兵除自伊犁回程者經由烏魯木齊外其南路回程官兵程途較遠莫若由博羅圖嶺等處亦取道烏魯木齊行走如有疲乏馬匹即於該處酌量撥換庶兩路官兵皆可將原來馬駝直抵肅州再行換給可省哈密雇車之費奏入得

旨軍機大臣速議具奏尋議換回駐防察哈爾官兵原議俟來春水草充足時撥給馬駝由邊外行

走其索倫兵令各城大臣酌量情形或今歲或來春俱由邊外遣回較之經行內地自覺節省俱應如所奏辦理其自南路回京之滿洲官兵該督請由烏魯木齊行走直至肅州固屬省便但查烏魯木齊馬匹業經奏准令換防之索倫察哈爾兵到彼撥換應查明此外尚有馬匹若干是否足敷回程官兵更換再烏魯木齊離肅州尚遠若其中馬匹實有疲乏或於哈密湊買

接濟尚屬易辦其所稱官兵騎馱一至肅州即就近交廠牧放以備撥補營驛缺額及倒斃過多賠補繳價各事宜並令照例咨部核辦奏入上從之

丁亥

命副都統素誠同原任巡撫圖爾炳阿往烏什辦事上諭軍機大臣曰烏什城與布魯特接壤安集延人等時來貿易事務頗多著派副都統素誠前往烏



什更換永慶素誠係新經任事之員恐一人不能獨辦現在庫車事簡有鄂寶已足辦理著圖爾炳阿前往烏什同素誠辦事

命賞給阿克蘇阿奇木伯克色梯巴勒氏看守墳塋人戶

上諭軍機大臣曰永貴等奏稱阿克蘇阿奇木伯克色梯巴勒氏因伊舊居烏什祖父墳墓在彼請將從前房產之入官者稍為撥給遣三四戶人前往

守視所給官項由阿克蘇抵交等語色梯巴勒氏  
前在軍營頗屬奮勉已加恩授為散秩大臣阿奇  
木伯克奉職亦屬盡心今以先壟之故請派數戶  
前往守視自宜允行所有給與田產著加恩賞賜  
不必由阿克蘇抵交著傳諭永貴等遵照辦理并  
曉示色梯巴勒氏知之

命優卹續查陣亡病故之呼倫貝爾等官兵親屬  
上諭軍機大臣曰阿桂等奏呼倫貝爾馬甲章固勒

圖兄弟三人隨征兄章固岱病故弟扎什鼐陣亡  
今補行查出應請議卹等語章固勒圖兄弟三人  
內二人在軍前病故陣亡殊屬可憫章固勒圖著  
加恩以驍騎校用又索倫領催達本達爾等父子  
兄弟四人者有陣亡病故者事亦相同著該將軍  
等將從前曾否辦理查明具奏又

諭曰阿桂隨帶之藍翎侍衛徹木布禮前在軍前頗  
知奮勉今於伊犁病故雖非陣亡可比殊堪憫惜

著加恩賞給恩騎尉令伊子承襲一次仍賞銀五

十兩

喀什噶爾辦事尚書永貴等疏奏更換駐防官  
兵經過回地事宜

永貴等奏言查現在伊犁換班之索倫兵由穆  
素爾嶺前來京師之滿洲兵或由朱爾都斯或  
由開展前來及換班兵丁回程俱經過回人村  
莊哈密開展吐魯番等處深知內地法度交易

尚覺公平自庫爾勒玉古爾庫車賽里木拜至  
阿克蘇自阿克蘇至葉爾羌喀什噶爾之大小  
村莊恐回人等貪利故昂市價而兵丁等或恃  
強滋事俱應預為籌辦再兵過時正值禾茂水  
滿之候應嚴禁馬駝踐踏地畝溝渠併預備船  
隻橋梁等項已行文各城大臣妥協辦理奏入  
報

聞

辛卯

軍機大臣疏奏通核派往伊犁等處官兵經過  
各省款項

軍機大臣奏言前據河南巡撫胡寶瑤將派往  
伊犁阿克蘇之滿洲兵二千名自河南至陝西  
安設臺站預備車馬給與口糧錢文共作銀二  
萬二千五百兩有奇列款具奏欽奉

諭旨以河南既經奏報則自京師以至伊犁阿克蘇

共費若干亦宜通查會核臣等遵將此次經行之直隸陝甘省及哈密巴里坤辦給各款皆行文查核今據各該處將所需實數折算銀兩咨覆臣等彙核除河南業經奏銷外直隸共需銀一萬七千二百兩有奇陝西共銀一兩二千四百兩有奇自甘肅出口至伊犁阿克蘇共銀十五萬四百兩有奇通計自京城起至伊犁阿克蘇止需銀二十萬四千兩有奇謹將支用款項

分晰列單具奏奏入報

聞



平定準噶爾方略續編卷十六

欽定四庫全書

平定準噶爾方略續編卷十七

乾隆二十七年五月庚子

諭都統侍郎公明瑞等通融派撥回城兵數事宜

上諭軍機大臣曰明瑞奏稱永貴等所定各城滿洲

索倫兵數喀什噶爾二百一十名葉爾羌阿克蘇

英噶薩爾等處各一百四十名必致離其本旗難

資管轄查換班滿洲兵每旗正數皆一百五十名

請按滿洲兵六百索倫兵三百正數喀什噶爾派  
滿洲兵二百索倫兵一百葉爾羌阿克蘇各派滿  
洲兵一百五十索倫兵五十英噶薩爾派滿洲兵  
一百索倫兵一百等語前永貴將各城兵數瑣細  
分派已覺過當今明瑞又斤斤較量所奏亦未明  
晰此項官兵非盡駐劄本城兼有臺站卡倫差遣  
即令稍爲撥補亦無不可著傳諭明瑞等彼此通  
融商酌不必過於拘泥

辛丑

命選侍衛三員派往烏魯木齊

上諭軍機大臣曰據旌額里等奏稱烏魯木齊照管貿易巡察臺站卡倫牧羣等事尚需侍衛人員等語著領侍衛內大臣揀選門上侍衛三員引見派往

陝甘總督楊應琚疏奏辦送挈眷移駐官兵

楊應琚奏言准烏魯木齊辦事大臣旌額理咨

承准軍機處議覆現在烏魯木齊兵丁有情願  
挈眷遷移者行文陝甘酌量辦送起程隨查本  
處有願駐官兵二百八十一員名俱給文令其  
各回該標營料理臣俱飭令各該地方官遵照  
原議妥協辦理并派委都司守備等員沿途照  
管於本年三四月內陸續起程奏入報

聞

乙巳

命補授伊犁厄魯特佐領等官

上諭軍機大臣曰據阿桂等奏稱現在伊犁新編厄魯特四佐領除侍衛庫庫濟克達什都卜珠爾分管三佐領外所餘一佐領請以驍騎校楚楚木擬正鄂勒錐博勒瑚擬陪其驍騎校現有四缺可否以虛銜藍翎和雅克齊等四員補授等語伊犁厄魯特從前所編兩佐領已命侍衛碩通等管轄今陸續來投之厄魯特等又增編四佐領著照阿桂

所請除庫庫濟克等三員俱補授佐領外所餘一  
缺著擬正之楚楚木補授其驍騎校四缺著和雅  
克齊綽哈普爾普達瓦烏哈圖補授

壬子

烏魯木齊辦事侍郎旌額理等疏奏製造農具  
事宜

旌額理等奏言查烏魯木齊屯田農具皆從內  
地運送今需用數多若本處有產鐵處所可以

採取製造較爲省便臣等訪之舊厄魯特等聞喀喇巴勒噶遜昌吉河源等處向曾產鐵隨飭吐魯番公素賚瑞派回人採取鐵砂百餘觔鎔鑄試看雖不及內地所出尚可供用但伊等僅能鎔鑄犁鏵於錘鍊刀鏹等器未爲熟習因行文楊應琚調取匠役數名前來製造俾屯田兵丁等習熟後即行發回奏入報

聞



甲寅

諭陝甘總督楊應琚核奏新疆茶法

上諭軍機大臣曰明德有減配茶封之奏業經下部  
議行但思茶商等照例完課應望多銷獲利何以  
轉願減少即云近議搭放兵餉地方行茶日夥是  
以不樂多配而兵丁所支茶封恐未必獲利蓋兵  
利有餘則商價自必日損商茶有利更無須抑派  
兵丁二者不可得兼其理甚明且現在庫茶實在

存積若干其最陳者起於何時近來折餉之外有  
無存積應行設法銷售之處著楊應琚逐一通核  
妥辦務俾公私均益此時新疆生聚漸繁物產豐  
裕惟茶必取之內地既糜脚價仍屬有名無實或  
臺站往來之便量力攜帶分貯俾日久積少成多  
則不動聲色而其事易集爲利亦溥即今歲明瑞  
所領各處換班兵三千餘名皆應裹帶鹽菜口糧  
或兵丁途次需茶而庫茶有餘可以酌量搭放俾

資日用即一面辦理一面奏聞

乙卯

議鑄給扎哈沁烏梁海部落印信等事宜

定邊左副將軍成袞扎布等奏言現在扎哈沁等一旗阿爾台烏梁海七旗唐努烏梁海四旗各安耕牧俱在卡倫以外雖各有總管未經頒給印信一切出入行走殊多不便查從前都爾伯特汗王扎薩克等請給印信臣等具奏蒙

恩頒發謹援例代請一體賞給其唐努烏梁海等尚未諳習事體所給印信或暫交副都統莫尼扎卜掌管俟該總管稍知約束所部再行賞給奏入得

旨軍機大臣議奏尋議扎哈沁烏梁海人等自乾隆十九年以來陸續歸附隨其戶口多寡編設旗分佐領計扎哈沁一旗九佐領二千餘口烏梁海七旗二十五佐領四千四百餘口唐努烏梁

海四旗十六佐領四千八百餘口雖經補授總管尚未鑄給印信應如成衮扎布所請擬給扎哈沁公扎木禪扎哈沁一旗總管之印一顆烏梁海內大臣察達克等阿爾台烏梁海七旗總管之印一顆唐努烏梁海四旗總管之印一顆兼用滿洲蒙古字照察哈爾總管印信式樣鑄造分別賞給及交該副都統暫掌又阿爾台淖爾烏梁海二旗四佐領七百餘口現係總管扎

喇納克巴勒桑統轄可否給與印信該將軍未經奏及應令查明具奏奏入

上從之

閏五月癸亥朔

喀什噶爾辦事尚書永貴等疏奏查辦續報回地果園事宜

永貴等奏言從前喀什噶爾查出波羅泥都等果園因伯克等初次呈報不無遺漏臣等曉示

令其首出免罪續據阿奇木伯克噶岱默特等  
於賞給官兵之果園十三處外續報出二十九  
處自應全行入官但念該伯克等始雖瞻徇一  
奉曉示即盡行呈首情有可原臣等酌量賞給  
阿奇木伯克果園三處伊沙噶以下伯克四處  
又希卜察克布魯特散秩大臣阿奇木英噶薩  
爾阿奇木伯克素勒坦和卓冲噶巴什布魯特  
阿瓦勒比等各給一處以爲來城住宿之地其

餘入官仍交回人看守採取賞給官兵再此等  
果園內尚有餵馬之苜蓿草每年可得二萬餘  
束定額徵收以供飼牧俱造具印冊永遠遵照  
奏入得

旨如所請行

戊辰

以新疆底定

恩賞在事諸臣世職



宣諭中外

上諭大學士曰從前準噶爾部落素不安分憑凌衆  
蒙古自噶爾丹時即肆跳梁侵擾喀爾喀西藏是  
以

皇祖

皇考不惜勞費先後興師征討數十年來上煩

聖慮伊等野性難馴喜事爭奪以致內自生亂互相  
殘滅爰有策凌等各率所屬歸誠朕以機會可乘

選將出師掃除凶逆大兵所至勢如破竹不一二  
年戡定禍難肅清疆宇擬欲綏爰有衆俾安生計  
詎伊等無福承受數應滅亡迭生叛亂是以更遣  
偏師殲除醜類遂有伊犁至回人爲準夷役使波  
羅泥都霍集占俱被拘於額林哈畢爾噶我兵初  
定伊犁時念伊等爲派噶木巴爾後裔釋歸故里  
乃霍集占受朕深恩毫不知感輒敢反噬傷我王  
臣因諭凱旋官兵乘勝收服葉爾羌喀什噶爾諸

回城追剿逆賊兄弟直抵拔達克山部落該酋即  
馘霍集占以獻此皆伊等罪惡貫盈上千

天譴是以軍行所過降服者撫抗命者誅數十載未竟  
之緒五年以來悉爲底定拓地二萬餘里均如內  
地兵民駐劄屯墾誠所謂非常之功也在事奮勉  
諸臣現經部臣查奏請

旨應得世職者約五百餘人朕以敵愾奏功勞績克  
著酬庸之典即稍從優渥亦非賞賚無節者比雖

其間實有奮勇出衆及隨營効力之不同但宣力行間均屬勤勞王事正不必過爲區別此內除達爾黨阿哈達哈皆僨事獲罪無容議給世職外其餘諸臣俱著照部臣所奏一體加恩賞給世職各於本身兼帶此等皆滿洲世僕得邀恩賞世祿以瞻其家更覺充裕而八旗添設世職五百餘員於旗人生計亦大有裨益並將此通諭知之

辛未

諭定邊左副將軍成衮扎布等哈薩克貿易事宜

上諭軍機大臣曰成衮扎布奏准科卜多副都統扎拉豐阿報稱哈薩克阿布賚遣使貢馬九匹所帶馬匹四百餘已派台吉等禁止貿易護送入覲等語哈薩克來使著派出爲首者數人緩行前往熱河候旨伊等所帶馬匹頗多自必乘便貿易從前阿桂請禁哈薩克北路貿易蓋慮伊等貪程遠近便遂不肯遠至伊犁但伊犁烏里雅蘇台皆屬內

地如過示區別亦於體制未協惟應禁止私市概  
從官辦而稍增物值減其馬價伊等無利可圖自  
必專向伊犁即令其仍貪近便情願減價則烏里  
雅蘇台官庫緞疋等物尚有雍正年間收貯者與  
其徒爲朽腐即以易馬或就近牧放或酌量撥解  
亦無不可成衮扎布接奉此旨若業經禁止貿易  
即以朕旨傳諭准其一體開市伊等若謂物價較  
伊犁有加亦諭以蒙古地方價值情形難與伊犁

一例至卡倫臺站人等私行交易斷宜嚴禁有犯必懲并傳諭阿桂知之

壬申

烏魯木齊辦事侍郎旌額理等疏奏建造兵丁房屋事宜

旌額理等奏言安西移駐烏魯木齊兵丁一千八百餘名約需住房三千六百餘間臣等於去年十月派員挑選屯田兵五百名查定各屯住

址伐木刈葦分造房屋計本年八月內可以竣  
事奏入報

聞

戊寅

叅贊大臣阿桂疏奏相度安設卡倫各事宜

阿桂奏言上年臣駐兵塔爾巴噶台查勘應設  
卡倫擬自輝邁拉呼至愛古斯招摩多自阿勒  
坦額默勒至伊犁河岸十七處立木爲記對伊



犁河四處壘石爲記今春派護軍統領伊勒圖  
等前往安設訖又據厄魯特等告稱特穆爾里  
克有準噶爾所埋大銅礮及礮內鐵子臣委護  
軍統領伊勒圖等前往辦理據報掘得大銅礮  
四位衝天礮筒八件大小礮子萬餘顆陸續運  
回收貯備用俟塔爾巴噶台駐兵時再將所立  
木石記號之處酌量安設卡倫奏入報

聞

己卯

諭巴里坤辦事都統永寧等預備換班官兵羊隻

上諭軍機大臣曰阿桂等奏稱新來伊犁換班之滿洲察哈爾侍衛官兵等自本年八月起一年內應支食羊三個月共需一萬三千餘隻除牧放及孳生羊隻外仍需羊七千五百餘隻可否交巴里坤大臣辦送等語著照所請傳諭該大臣等將喀爾喀等往巴里坤所售羊隻照數採買選派官兵沿

途加意牧放送伊犁

庚辰

以巴里坤辦事副都統永慶疏奏查辦布魯特  
所攜軍器傳

諭阿克蘇等處駐劄大臣查核外藩貿易舊例

上諭軍機大臣曰永慶奏稱布魯特車里克齊游牧  
人等以貿易前來據卡倫查報所攜鳥鎗三桿及  
事畢起程又查出鳥鎗十七桿及腰刀棉甲等件

與原數不符業將軍器扣留給還原價等語布魯特等與回人接壤彼此以軍器交易必相沿已久有何關係如謂伊等心懷叵測豈買得鳥鎗數桿遂能生事似此辦理轉覺瑣屑但向例禁止與否亦未可知著傳諭阿克蘇等處駐劄大臣等會同查核具奏

壬午

喀什噶爾辦事尚書永貴等疏奏辦送伊犁布

足事宜

永貴等奏言前准阿桂咨商以葉爾羌喀什噶爾餘糧折算普爾售買布疋運送伊犁臣等通計喀什噶爾餘糧及需用各款儘數辦理其餘再行辦買布疋具奏欽奉

諭旨觀此情形僅敷爾等之用不能再助伊犁何不從實具奏仰惟

聖明洞鑒無微不至查前次阿桂咨商之時臣等正

在預備採買換班官兵馬匹牲隻是以未能定  
議今烏魯木齊伊犁大臣俱奏明馬匹牲隻足  
用停止採買喀什噶爾餘糧作價之普爾除支  
用外仍可得三千騰格回地每布一疋其價止  
普爾四十文計辦運布疋二千及染色包裹共  
用普爾一千九百四十餘騰格以臺車送至阿  
克蘇轉運伊犁仍餘普爾一千五百餘騰格以  
備來歲之需奏入報

聞

六月壬辰朔

申諭定邊左副將軍成衮扎布等哈薩克貿易事宜  
上諭軍機大臣曰成衮扎布等奏奉到辦理哈薩克  
貿易諭旨隨酌量曉示該使人據稱因道遠多帶  
馬匹並非專來貿易若有願售者亦可變價等語  
哈薩克全部均爲臣僕其在西邊游牧者與伊犁  
烏魯木齊相近自應在彼貿易至阿布賚游牧與

古爾班察爾相近在北路行走爲便伊等情願來  
烏里雅蘇台貿易亦無不可至盜賊爭鬪等事惟  
派委幹員照料約束自然安靜其貿易之處可不  
必停止

癸巳

諭叅贊大臣扎拉豐阿奏報科卜多屯田情形

上諭軍機大臣曰科卜多新開屯田特派扎拉豐阿  
前往伊至彼處即應將一切情形一面報知將軍



一面具奏迄今數月雖將墾田二十頃之處呈報  
一次此時地土肥磽雨澤應時與否及禾苗若何  
滋長並未奏及伊係叅贊大臣副都統又專辦軍  
屯有事自應入告著成袞扎布等傳諭扎拉豐阿  
令將前項情形明白具奏

己亥

命議給世職官員通較前後功次

上諭軍機大臣曰據正白旗滿洲奏稱黑爾根城副

都統鄂博什在軍前効力曾賞給雲騎尉今又議  
賞三等輕車都尉其所得雲騎尉應居何等現在  
咨查該部等語此次平定伊犁回部有軍功出衆  
者一經奏報即交部議敘給與世職原屬鼓勵戎  
行之意今大功告成通行查核從前曾賞世職人  
員該部自應分別辦理蓋世職之崇卑視軍功之  
大小現在議給之職若太於從前所賞者即銷去  
前職尚屬可行至前後功次略同俱令留襲既屬

太過或將前次功牌註銷專諭後來功賞亦未免  
偏枯此間權衡較量必通計前後所得功次應給  
何職酌量定議方爲平允著該部將此次議給世  
職各員通行查核畫一辦理具奏

乙巳

諭回部辦事大臣等酌定伯克等貢獻事宜

上諭軍機大臣曰達桑阿奏稱庫爾勒王古爾伯克  
等貢獻馬匹緞疋等物謹派員賚送等語庫爾勒

王古爾等回人遷居甫定其生計自屬不足且回人等欲有所獻亦當視其品級以昭體制若小頭目等皆准入貢則各城互相倣倣殊覺非體且伊等果出於誠悃或當入覲來京時行之尋常何必瀆獻上年

皇太后萬壽大慶回人恭效祝釐俱已計值賞賜嗣後會逢盛典回人等所進方物該大臣等察收具奏此外不必允准現在所進馬匹什物既經收受著

計值頒賞并通諭各城駐劄大臣曉示該伯克等知之

丙午

叅贊大臣阿桂等疏奏伊犁恭建

關帝神祠

阿桂等奏言臣等因伊犁建造城垣公署謹擇地恭建

關帝廟繪像供奉每年春秋致祭又原任將軍班第

叅贊大臣鄂容安在伊犁竭忠全節應否製造  
神牌於廟後房屋設位致祭伏候

欽定奏入報

聞尋

賜名雙烈祠

庚戌

命議敘解送阿克蘇馬匹官兵

上諭軍機大臣曰海明等奏稱烏魯木齊送馬一千

二百匹至阿克蘇全無傷損等語烏魯木齊至阿克蘇中間踰越山嶺經行戈壁解送馬匹官兵等善爲照料不致傷損殊屬可嘉著將在事官弁等交部議敘兵丁照例給賞

阿克蘇辦事都統侍郎海明等疏奏各城羊隻足敷支給情形

海明等奏言前准巴里坤駐劄大臣永寧等咨查阿克蘇本年官兵口糧羊隻果否敷用來年

於何時辦理臣等以現購布魯特羊隻頗多無庸辦送咨覆查本年除支給阿克蘇烏什庫車賽里木拜五城官兵羊隻外阿克蘇現有內地辦送及購買布魯特之羊共九千二百餘隻五城官兵三年共需羊一萬三千餘隻雖現數不敷而歲有孳生羊一千四百餘隻三年內合算已足敷支給奏入報

聞



甲寅

命加給屯田被災民人口糧

上諭軍機大臣曰旌額理等奏稱內地送到屯田民人四百餘戶俱知勉力耕作因雨澤稍歉又有野鼠食禾被災自一二分至七八分等語內地民人頗知力作偶值偏災伊等俱係新遷並無積蓄若不加以接濟則伊等拮据口食不能盡力耕耘現在烏魯木齊尚有餘糧其作何加給升斗俾無失

所著傳諭旌額理等一面辦理即行具奏

秋七月壬戌

議哈密裁撤司員筆帖式事宜

禮部尚書永貴等奏言準噶爾回部自平定以來駐兵屯田巴里坤哈密已成內地而哈密尤爲事簡所有辦事大員應請裁撤再從前因係回民雜處派理藩院司官筆帖式諭班辦事今玉素富所屬回人頗知守法無庸添設冗員請

一併裁去奏入得

旨軍機大臣議奏尋議前經楊應琚等請裁哈密辦事大員歸巴里坤兼辦欽奉

諭旨哈密爲新疆往來要地未便裁撤大員今永貴所奏相同應無庸議至所請裁汰理藩院司官筆帖式查從前派出司員原爲承辦軍務今既有辦事大員及隨印司員筆帖式等則該衙門官員自可撤回嗣後不必輪班派出奏入

上從之

已已

陝甘總督楊應琚等疏奏移駐烏魯木齊官兵  
起程日期

楊應琚等奏言安西提標前後二營兵丁一千  
四百九十二名前經奏准移駐烏魯木齊於本  
年秋初起程續經奏請烏魯木齊設副將一員  
提標前後二營改爲協標左右二營仍聽提臣

統轄茲值官兵起程屆期臣五福於六月初旬  
自巴里坤前來安西將移駐兵丁酌分五起第  
一起定於九月初二日起程間日一行並飭副  
將舒敏妥協料理奏入報

聞

辛未

命撤回索倫察哈爾兵丁由邊外行走

上諭軍機大臣曰阿桂奏稱新疆所駐索倫察哈爾

官兵現在阿克蘇以西今因換班撤回索倫兵過  
烏里雅蘇台察哈爾兵過烏魯木齊各歸游牧甚  
近應令其先至伊犁由邊外轉回即末隊稍值冬  
寒亦可在伊犁度歲等語所見甚是撤回兵丁非  
派出征勦者可比惟視其行走便利方爲有益且  
更代兵丁亦係緩行則撤回者不妨在伊犁少爲  
休息於來年二三月遣回游牧著傳諭永貴楊應  
琚遵照辦理

癸酉

命副都統侯訥蘇懇往烏魯木齊辦事

上諭軍機大臣曰永德在烏魯木齊有年著派訥蘇  
懇往代永德即著來京

甲戌

哈薩克阿布賚使人都爾特赫勒蘇爾統等入

覲於廣仁嶺前恭迎

聖駕

上駐蹕避暑山莊行宮

召見

命隨觀木蘭圍場

乙亥

諭禮部尚書永貴等派員曉示霍罕部落事宜

上諭軍機大臣曰永貴等奏稱額德格訥阿濟比所屬鄂斯等處爲額爾德尼占據親來懇請遣使持書往諭因酌給印文令其自行傳送等語額爾德



尼自恃力强侵擾鄰部若將額德格訥所屬占據  
不還未免滋事永貴等措辭未爲嚴厲伊等豈能  
警動此時額爾德尼若將所據之地給回固善如  
稍涉游移永貴等即派幹員諭以致書係我等私  
意欲保全爾等游牧尚未陳奏今欲視爲無足重  
輕則當奏聞請旨夫以强凌弱乃大皇帝所深惡  
萬一天威不測命我等興師問罪雖後悔無及矣  
似此剗切曉示伊等自必信從所遣使人歸日即

將該部落情形具奏

丁丑

諭新疆駐劄大臣等更換辦事官員事宜

上諭軍機大臣曰海明奏稱員外郎夔舒在新疆行走四年本年十一月又一年屆滿主事七十一等從乾隆二十五年正月扣至本年十二月亦滿三年請預派人員更換等語夔舒已滿四年自應更換至七十一等又何必亟爲奏請派遣伊等辦事

特予以奮勉之路以臣僕之義論之雖多駐二  
年本情理之常原不必計算年限即限年更換亦  
必計其任事之日月乃并奉派起程之時俱行算  
入則往還即滿三年又何暇辦理公事若司員等  
有意請求即係顧戀私家不知大體或大臣等爲  
之陳奏更屬沽名邀譽致長澆風甚覺紕繆著傳  
諭各該駐劄大臣等凡派出人員必任事三年再  
行奏請更換不得似此預行具奏

戊寅

命更代阿克蘇等處辦事大員

上諭軍機大臣曰永寧在巴里坤和其衷在阿克蘇  
辦事並逾三年著德福往代和其衷鍾音往代永  
寧曹瑛仍回西安副都統任其協辦伊犁事務著  
伍彌泰前往

甲申

命更代哈密辦事道員


上諭軍機大臣曰淑寶在哈密辦事已逾三年著楊  
應琚於陝甘道員內揀選一員前往辦事淑寶即  
著來京

庚寅

命陞授侍衛扎奇勒圖等二等侍衛賞給世職

上諭軍機大臣曰近將軍功人員交部核對功牌賞  
給世職因三等侍衛扎奇勒圖阿勒丹察等功次  
平常未經議給此二人在兆惠軍前殊屬奮勉而

出入重圍冒險請援尤爲勞績懋著雖伊等得官  
後功牌較少而前在兵丁分內所得之功牌甚多  
足以相抵自應格外加恩扎奇勒圖阿勒丹察著  
授爲二等侍衛賞給騎都尉令伊等本身隨帶



平定準噶爾方略續編卷十七